





燕召公世家第四

古史十一

召公奭周之同姓食采於召文王起於岐周而化行於南方  
江漢之國召公實掌其諸侯之政故詩曰文武受命有如召  
公之臣日闢國百里召公之治諸侯甚得民和親聽男女之  
訟止於甘棠之下以決事及召公沒而民思之愛其甘棠不  
忍伐也故召南有甘棠行露之詩武王克商封召公於北燕  
而留爲周太保西旅獻獒召公作旅獒以戒武王武王崩管  
蔡以殷叛周公東伐召公與太公闢成王明周公無罪成王  
乃逆周公於東及成王將宅洛邑使召公先相宅召公以庶  
殷攻位於洛汭位成而周公至召公作誥以戒成王周公亦作  
洛誥而歸政焉成王既蒞政二公爲左右相自陝以東周公



主之自陝以西召公主之詩周南召南以二公為名周南南為周

人之詩召南為諸侯之詩周公治內而召公治外無疑也

及成王之世分天下以為左右二伯領之故公羊言白陝

以東周公主之自陝以西召公主之按書周公必敦頌民

遷于洛邑君陳畢公繼之而召公亦稱伯相康王之詔曰

太保率西方諸侯入應門左畢公率東方諸侯入應門右

然則二公存文王世分治內外在成王世分掌東西其事

也各異召公不說恐成王未能君天下周公作書諭之名之

曰君奭召公復為公劉洵酌卷阿之詩以戒成王周公沒

召公與畢公終相成王立康王召公卒其長子在燕其次

子留周為召公世世輔周與周公比其顯者召虎佐周宣

王燕自召公以下九世至惠侯惠侯當周厲王奔燕共和之

世惠侯卒子僖侯立是歲周宣王即位僖侯三十六年卒

子頃侯立頃侯二十四年卒子哀侯立哀侯二年卒子鄭

侯立鄭侯三十六年卒子繆侯立繆侯七年而魯隱公之元

年也十八年卒子宣侯立宣侯十三年卒子相侯立相侯七年卒

子莊公立春秋魯莊公之十九年當燕莊公之十六年

父諸儒皆言立子頹者南燕姓南燕近衛於事為信而

太史公以為北燕姬姓按春秋書姬姓之燕皆曰北燕則

獨書燕者二十七年山戎病燕齊相公為燕伐山戎歸燕

侵地使燕脩召公之法共貢天子莊公三十三年卒襄公

立襄公四十年卒相公立相公十六年卒宣公立宣公十

五年卒昭公立昭公十三年卒武公立武公十九年卒文  
公立文公六年卒懿公立懿公四年卒子簡公款立史記  
作惠簡公多嬖寵欲去諸大夫而立其寵六年冬諸大夫  
比以殺公之外嬖公懼奔齊燕人奉悼公以為國悼公雖立



而未改元九年冬齊景公以兵納簡公晏嬰曰不入燕有君  
 矣民不貳吾君賄左右諂諛作大事不以信未嘗可也明  
 年正月齊師次于號燕人歸燕姬賂以瑤壘王檀學耳盟  
 于濡上不克納而還悼公於是改稱元年六年齊高偃帥  
 師納簡公于陽而史記惠公在齊四年齊人納之惠公至燕  
 而燕既立悼公蓋失之矣以晏子之言考  
 之則簡公之出也燕既知其決不得歸然後即位改元耳至  
 及齊納簡公而不入燕既知其決不得歸然後即位改元耳至  
 悼公六年齊高偃又以兵納簡公于陽豈有惠公九年  
 燕而死之說乎太史公之為人粗而不詳其於詩書春秋  
 皆未嘗究觀本末又篤信戰國雜說意欲異自成一家  
 而輕失實之謬孔子序詩書皆因古文而略發明之豈求  
 異哉悼公七年卒共公立共公五年卒平公立平公十九年  
 卒簡公立簡公十二年卒獻公立獻公二十八年卒孝公  
 立孝公十五年卒成公立成公十六年卒湣公立湣公三十

一年卒釐公立時三晉始列為諸侯釐公三十年伐齊敗  
 于林營釐公卒桓公立桓公十一年卒文公立文公二十八  
 年蘇秦來說請與趙從親文公與之車馬金帛使至趙趙  
 肅侯聽之因約六國為從長秦惠王以其女為燕太子婦  
 二十九年文公卒太子立是為易王易王元年秦使犀首說  
 齊魏共伐趙以敗從約蘇秦自趙入燕易王初立齊宣王  
 因我喪伐取十城蘇秦為燕說齊復得十城十年燕君為  
 王蘇秦通文公夫人懼誅乃說王使齊為反間欲以亂齊  
 易王十二年卒子噲立齊人殺蘇秦蘇秦之在燕與其相  
 子之為婚而蘇代與子之交及蘇秦死而齊宣王復用蘇  
 代王噲三年與楚三晉攻秦不勝而還子之相燕貴重主



新蘇代爲齊使於燕燕王問曰齊王奚如對曰必不伯燕  
王曰何故對曰不信其臣蘇代欲以激燕王尊子之於是  
燕王大信子之子之因遺蘇代百金而聽其所使鹿毛壽  
謂燕王不如以國讓子之堯以天下讓許由許由不受有讓  
天下之名而實不失天下今王以國讓於子之子之必不敢  
受是王與堯同行也燕王因屬國於子之子之大重或曰  
禹薦益於天而以啓人爲吏及老傳天下於益啓與交黨  
攻益奪之天下謂禹名傳天下於益實令啓自取之今王  
言屬國於子之而吏無非太子之人者是名屬子之而實  
太子用事也王因收印自三百石吏以上而效之子之子之  
南面行王事而噲老不聽政顧爲臣三年國大亂民恟恐

將軍市被與太子平謀將攻子之儲子謂齊潘王曰因而  
赴之破燕必矣齊王因令人謂太子平曰寡人聞太子之  
義將廢私而立公飭君臣之義明父子之位弊邑雖小不  
足以爲先後雖然唯太子所以令之太子因聚衆使將軍  
市被圍公宮攻子之不克市被及百姓反攻太子市被死  
構難數月死者數萬人百姓離心齊王因令章子將而伐  
燕士卒不戰城門不閉燕君噲死子之亡二年而燕人共  
立太子平是爲昭王昭王即位收破燕卑身厚幣以招賢  
者謂郭隗曰齊因孤國之亂而襲破燕孤極知燕小力少  
不足以報然誠得賢士以共國以雪先王之耻孤之願也  
先生視可者得自事之郭隗曰王必欲致士先從隗始隗



且見事况賢於隗者豈遠千里哉於是昭王為隗改築宮而師事之樂毅自魏往鄒衍自齊往劇辛自趙往士爭趨燕燕王弔死問孤與百姓同甘苦使蘇代事齊為間使樂毅交結諸侯二十八年燕國殷富士卒樂軼輕戰於是以樂毅為上將軍與秦楚三晉合謀以伐齊齊兵敗湣王出亡於外燕兵獨追北入臨菑盡取齊寶燒其宮室宗廟城之不下者獨莒即墨其餘皆屬燕三十三年昭王卒子惠王立惠王為太子時與樂毅有怨及即位疑毅使騎劫代將樂毅亡走趙齊田單以即墨敗燕騎劫死燕兵引歸齊悉復得其故城惠王七年卒武成王立史記趙惠文王二十八年書燕將成安君

齊田單伐我拔中陽十四年武成王卒子孝王立

燕四王三君有

二惠二信二宜三桓二昭二文二簡二孝雖辟陋少文恐不至此蓋譜系脫謬耳案左傳記簡公款甚明而史記以為

為惠公則其餘失實者可知也孝王三年卒子王喜立四年王命相栗腹

約歡趙以五百金為趙王酒還報曰趙壯者皆死長平其

孤未壯可伐也王召昌國君樂間問之對曰趙四戰之國

其民習兵不可伐王曰吾以五而伐一對曰不可燕王怒

羣臣皆以為可卒起二軍車二千乘栗腹將而攻鄒卿秦

攻代獨大夫將渠謂燕王曰與人通關約交以五百金飲

人之王使者報而反攻之不祥兵無成功王不聽自將偏

軍隨之將渠引王綏止之曰王必無往往無成功王寔之

以足將渠泣曰臣非自為乃為王也燕軍至宋子趙使廉



頗將破栗腹於鄣使樂乘將破卿素於代廉頗逐燕軍五百餘里圍其國樂間奔趙燕人請和趙人不許必令將渠處和燕相將渠以處和趙聽將渠解圍去六年秦滅東西周九年秦王政初即位十二年趙使李牧攻燕拔武遂方城劇辛故居趙與龐煖善已而亡走燕是時趙數困于秦而廉頗以讒去龐煖為將燕欲因趙弊攻之問劇辛辛曰龐煖易與耳遂使劇辛將擊趙趙使龐煖擊之取燕軍二萬殺劇辛二十三年太子丹質於秦亡歸燕二十五年秦滅韓二十七年秦滅趙趙公子嘉自立為代王燕見秦且滅六國秦兵臨易水禍且至燕太子丹陰養壯士二十人使荆軻獻督元地圖於秦因襲刺秦王秦王覺殺軻侯將軍王翦擊燕二十九年秦拔我薊燕王亡徙居遼東斬丹以獻秦三十年秦滅魏三十三年秦拔遼東虜王喜卒滅燕

蘇子曰燕召公之後然國於蠻貊之間禮樂微矣春秋之際未嘗出與諸侯會盟至於戰國亦以耕戰自守安樂無事未嘗被兵文公二十八年蘇秦入燕始以縱橫之事說之自是兵交中國無復寧歲六世而亡吳自大伯至壽夢十七世不通諸侯自巫臣入吳教吳乘車戰射與晉楚力爭七世而亡燕吳雖南北絕遠而興亡之迹大略相似彼說客策士借人之國以自快於一時可矣而為國者因而徇之猖狂恣行以速滅亡何哉夫起於僻陋之中而奮於諸侯之



上如商周先王以德服人則可不然皆禍也至太子丹不聽鞠武而用田光欲以一匕首斃秦雖使荆軻能害秦王亦何救秦之滅燕而況不能哉此又蘇秦之所不取也

燕召公世家第四

蔡叔曹叔世家第五

古史十二

蔡叔度者周武王之弟也武王同母兄弟十人武王既克殷紂平天下封昆弟而伯邑考前卒無後於是封叔鮮於管封叔度於蔡二人相紂子武庚祿父治殷遺民封叔旦於魯相周爲周公封叔振鐸於曹封叔武於成封叔處於霍康叔封冉季載皆少未得封武王崩成王少周公位冢宰正百工群叔流言疑周公不利成王管叔蔡叔挾武庚以作亂周公伐誅武庚殺管叔放蔡叔于鄆鄰以車七乘降霍叔于庶人三年不齒而以殷故地封康叔爲衛君封季載于冉康叔冉李皆有馴行故周公以康叔爲周司寇冉季爲周司空以佐成王皆有令名於天下蔡叔度既遷



死其子胡率德改行周公以為已卿士言於成王復封之  
 蔡以奉蔡叔之祀是為蔡仲蔡仲卒子蔡伯荒立蔡伯荒  
 卒子官侯立官侯卒子厲侯立厲侯卒子武侯立武侯之  
 出周厲王失國奔彘諸侯多叛周武侯卒子夷侯立夷侯  
 十一年周宣王立二十八年夷侯卒子釐侯所事立釐侯  
 三十九年周室東徙四十八年釐侯卒子共侯興立二年共  
 侯卒子戴侯立十年戴侯卒子宣侯考父立宣侯二十八  
 年魯隱公初立三十五年宣侯卒子相侯封人立五年公  
 會鄭伯于鄧以謀楚楚於是始大八年師及衛人從王伐  
 鄭鄭敗我及衛射王中肩九年殺陳佗而立陳厲公二十  
 年相侯卒國人召相侯之弟獻舞于陳而立之是為哀侯

哀侯與息侯皆娶于陳息媯過蔡哀侯不為禮息侯怒謂  
 楚子伐我我求救於蔡而伐之楚子從之十一年楚敗我  
 師于莘以哀侯歸哀侯怨息侯繩息媯以語楚子楚子滅  
 息而納息媯生堵敖及成王不言十五年楚子為息媯故  
 伐我以說哀侯留楚九年二十年卒蔡人立其子肱是為  
 穆侯穆侯女弟為齊桓夫人十八年齊侯與蔡姬乘舟于  
 圉蕩公公懼禁之不止怒而歸之蔡人嫁之十九年齊侯  
 以諸侯侵蔡蔡潰遂伐楚二十一年諸侯伐鄭楚子圍許以  
 救鄭冬公以許僖公見楚子於武城許男面縛銜璧大夫  
 衰經士輿櫬楚子禮而復之二十九年穆侯卒子莊侯甲午  
 立三十三年晉趙盾合諸侯于新城公不會三十四年晉



卻缺帥師伐我為城下之盟而還莊侯卒子文侯申立二  
十年文侯卒子景侯固立三年楚公子嬰齊以諸侯之師  
侵魯及衛彭名御戎景公為左許靈公為右二公弱皆強  
冠之盟于蜀蔡許乘楚事故不列於會七年晉欒書侵我  
楚公子申以申息之師來救晉不戰而還九年晉欒書復  
侵我初文侯欲事晉曰先君與於踐土之盟畏楚不能行  
而卒楚人使蔡無常三十九年公子癸求從先君以利蔡  
國人殺之其弟履奔楚四十六年公孫歸生會晉趙武楚  
屈建及諸侯之大夫盟于宋四十七年以宋之盟故公朝  
于晉過鄭不敬鄭子產曰蔡君必不免初太子般娶于楚  
公通焉四十九年般弑景公而自立是為靈侯二年楚公

子圍弑其君鄭敖而自立十二年四月楚子誘靈侯殺之  
于申使公子棄疾帥師圍我十月滅蔡執世子有以歸用  
之子岡山使棄疾為蔡公蔡滅之二年蔡之遺臣朝吳與  
觀從矜棄疾之命召楚亡公子比公子黑肱而納之楚靈  
王死棄疾殺比黑肱而自立復封陳蔡立隱太子有之子  
廬是為平侯十月葬靈公朝吳有寵於楚君費無極害之  
三年護之蔡大夫大夫逐之奔鄭八年平侯卒子朱立侯朱  
元年三月葬平侯朱失位在卑魯叔孫婁聞之曰必不終  
平侯之弟曰東國費無極取貨焉謂蔡人曰朱不用命君  
主將立東國蔡人懼出朱而立東國是為悼侯朱許于楚  
不克悼侯二年朝于楚六月卒于楚弟昭侯申立十年朝



于楚爲兩佩兩裘以其二獻昭王而已服其一楚令尹囊瓦欲之弗與止之三年獻之乃得歸及漢沉王而誓曰余所有濟漢而南者有若大川遂如晉以子元與大夫之子爲質而請伐楚十三年晉爲我合諸侯於召陵以謀楚晉荀寅來貨弗得而止沈子不會晉命我伐之遂滅沈楚以沈訖圍我昭侯以子乾與大夫之子爲質於吳吳爲我伐楚入郢二十五年春楚子以諸侯之師圍我蔡人男女辨以聽命使疆于江汝之間而還於是請遷于吳既而悔之二十六年吳洩庸來聘而稍納師師畢入殺公子駟以說乃遷于州來二十八年公將如吳諸大夫恐其復遷也公孫翩逐而射之入於家人而卒國人殺翩及公孫姓公孫霍而逐公孫辰子成侯朔立十三年楚滅陳十九年成侯卒子聲侯產立十五年聲侯卒子元侯立六年元侯卒子侯齊立四年楚惠王滅蔡蔡遂絕祀

蘇子曰世俗之說曰舜囚堯不得其死禹逐舜終於蒼梧之野周公將篡成王二叔譏之乃免於亂彼以小人之情度君子之心亦何所不至哉今夫聖人雖與世同處而其中浩然與天地同量彼其食粟衣帛蓋有不得已耳而況與人爭利哉諸葛孔明受託昭烈以相孺子雖使取而代之蜀人安焉然君臣之義沒身不替孔明尚然而況於聖人乎彼小人何足以知之

曹叔振鐸與成叔武霍叔處皆就封不得爲王官叔振鐸



卒子太伯脾立太伯卒子仲君平立仲君卒子宮伯侯立  
宮伯卒子孝伯雲立孝伯卒子夷伯喜立夷伯二十三年周  
厲王奔彘三十年夷伯卒弟幽伯強立幽伯九年弟蘇弒  
幽伯代立是爲戴伯戴伯元年周宣王立三歲矣三十年  
戴伯卒子惠伯兕立惠伯二十年周幽王爲犬戎所殺三  
十六年惠伯卒子石甫立其弟武弒之代立是爲繆公繆  
公三十年卒子栢公終生立栢公三十五年魯隱公立五十七  
年栢公有疾使世子射姑朝魯五十五年栢公卒子莊公  
射姑立三十一年莊公卒世子羈不能自立奔陳國人立赤  
是爲僖公九年僖公卒子昭公班立九年昭公卒子共公襄  
立十六年晉公子重耳自齊來公不禮焉薄而觀其駢脅

僖負羈之妻謂其夫曰吾觀晉公子其從者皆賢若反國  
必得志於諸侯得志必誅無禮子盍蚤自貳乃具盤飧寘  
璧以饋重耳受飧反璧十七年重耳自秦入晉二十一年晉  
侯來討執公以畀宋人令軍無入僖負羈之宮而免其族  
以報冬晉侯有疾共公之豎侯孺貨筮史使以曹爲解曰齊  
桓公爲會而封異姓今君爲會而滅同姓曹叔振鐸文之  
昭也先君唐叔武之穆也合諸侯而滅兄弟非禮也與衛  
偕命而不與偕復非信也晉侯說歸共公三十五年共公  
卒子文公壽立二年公朝于魯六年夏復朝于魯冬齊侯  
伐我入郟討朝魯故十年宋武穆之族來奔請師以伐宋  
秋宋師圍我二十三年文公卒子宣公盧立十七年公會諸



侯伐秦卒于師曹人使公子負刳守使公子欣時逆公之喪負芻殺其世子而自立是爲成公冬葬宣公欣時將亡國人皆將從之負芻懼讐罪且請焉欣時反而置其邑三年晉侯以諸侯來討執公歸于京師將見欣時而立之欣時逃奔宋曹人告于晉請歸公而反欣時晉侯許之欣時反成公歸二十二年衛石買孫蒯伐我取重丘愬之于晉二十三年夏晉人爲我執石買孫蒯冬公會諸侯圍齊卒于師子武公滕立二十七年武公卒子平公須立四年平公卒子悼公午立九年公朝于宋宋人囚之國人立其寧野是爲聲公年表悼公死于宋歸葬聲公五年平公弟通弑聲公代立是爲隱公四年聲公弟露弑隱公代立是爲靖公四年

襄公

悼公

靖公卒子伯陽立初國人有夢衆君子立於社宮謀亡曹曹叔振鐸請待公孫彊許之且求之曹無之戒其子曰我死爾聞公孫彊爲政必去之及伯陽即位好田弋曹鄙人公孫彊獲白鴈獻之且言田弋之說因訪政事說之使爲司城以聽政夢者之子乃行彊言霸說於曹伯曹伯從之乃背晉而奸宋十四年宋人伐我築五邑於郊曰黍丘揖丘大城鐘邠晉人不救十五年宋公復伐我將還褚師子肥殿曹人詬之不行師待之宋公怒命反之執曹伯及司城彊以歸殺之遂滅曹春秋之際其君子猶習於周之故其言大王之昭有大伯虞仲王季之穆有虢仲虢叔文王之昭有管蔡成虛魯衛毛聃郇雍曹滕畢原鄆郟武王之



穆有邠晉應韓周公之胤有元蔣邢茅胙祭惟管叔以  
罪大無後大伯之後為吳叔度之後為蔡叔旦之後為魯  
叔封之後為衛叔振鐸之後為曹叔虞之後為晉今皆有  
世家虞仲五世為周章周章之弟亦曰虞仲武王封之夏  
虛其後為晉獻公所滅虢仲虢叔為文王鄉士虢仲為西  
虢晉獻公所滅虢叔為東虢鄭所滅鄭莊公曰制巖邑也  
虢叔死焉則東虢國  
於虎  
年也邾魯莊公八年降齊為附庸魯文公十二年邾伯奔  
魯霍為晉獻公所滅毛公事成王為三公在周有毛伯衛毛  
伯過毛得滕常與諸侯會朝後春秋七世齊所滅畢公高  
事成王為三公其後畢萬入晉為魏原在周有原莊公原  
襄公原伯絞公子跣尋原伯魯原壽過韓宣王之世為諸

侯伯詩人為作韓奕凡在周事厲王者作板之詩事幽王  
者作瞻卬召旻之詩邢嘗為狄所伐齊桓公帥諸城夷儀  
而遷之後為衛文公所滅祭在周有祭公謀父事穆王寂  
賢惟聃季載為周司空郇侯為諸侯伯詩曰四國有  
王郇作勞之與郇雍  
鄆邠應蔣茅胙其後皆不見蘇子曰孟子有言王不待大  
而伯必有大大國王者以德伯者以力以德服人凡有知者  
莫與之較以力服人力之所不勝則殆故湯以七十里文  
王以百里齊桓晉文皆因大國之資而後有成齊襄公楚  
靈王奮齊楚之力無德而求諸侯國未可亡而身死之曹  
伯陽宋王偃國小德劣而圖伯者之事身死而國隨以  
滅夫惟樂天者可以保天下畏天者可以保其國未能畏



天而求樂天之功難哉

蔡叔曹叔世家第五

陳杞世家第六

吉史十三

陳胡公滿者虞舜之後也舜為庶人娶堯之二女居于媯  
汭其後因姓媯氏有虞闕父者為周武王陶正武王賴其  
利器用與神明之後也封其子媯滿於陳太昊之虛妻之  
以元女大姬分之以肅慎氏之貢使奉舜祀以備三恪是  
為胡公胡公卒子申公犀侯立申公卒弟相公皐羊立相  
公卒立申公之子突是為孝公孝公卒子慎公圉戎立慎  
公立當周厲王時慎公卒子幽公寧立十二年周厲王奔  
彘二十三年幽公卒子釐公孝立六年周宣王即位三十六  
年釐公卒子武公靈立十五年武公卒子夷公說立是歲  
周幽王即位三年夷公卒弟平公變立七年周幽王為犬



戎所殺二十三年平公卒子文公圍立十年文公卒子桓  
公鮑立二十三年魯隱公初立二十七年鄭莊公使來請成  
公不許公子佗曰親仁善鄰國之寶也公曰宋衛實難鄭  
何能為二十八年鄭伯來侵大獲而歸三十八年正月桓公  
卒佗殺太子免而自立佗文公之子也公疾病而亂作國  
人分散故以甲戌巳丑再赴於諸侯桓公之子躍蔡出也  
明年八月蔡人為之殺佗而立躍是為厲公厲公生子子  
七年厲公卒弟莊公林立七年莊公卒弟宣公拊曰立  
文公娶蔡女生佗故蔡人為佗殺五父及太子免而立佗  
是為厲公七年而太子免之弟躍林拊曰使蔡人誘厲公  
殺之而立躍是為利公立五月死明年莊公林立今  
按左傳佗即五父而非蔡出也蔡出乃厲公躍耳蔡人為  
躍殺佗在相公卒之明年而躍卒在躍之七年皆十四年  
見于春秋不知太史公何從得此皆不足信也

齊桓公始伯會諸侯于鄆始進陳叙衛上宣公之太子曰  
禦寇嬖子曰欵愛欵將立之二十一年殺禦寇而立欵公子  
完與顓孫奔齊完留齊為田氏顓孫自齊奔魯三十七年  
齊桓公以諸侯伐楚至召陵還將道陳鄭之間陳轅濤塗  
患之與鄭申侯謀請出東道申侯反之於齊桓公怒執濤  
塗使魯人江人黃人伐我冬諸侯復伐我我請成齊歸濤  
塗四十五年宣公卒子穆公欵立七年宋襄公將求諸侯  
而虐邾鄆公告於諸侯請修好焉以無忘齊桓之德冬盟  
于齊十一年楚成得臣伐我取焦夷城頓十三年楚得臣  
復圍我以納頓子十六年晉文公敗楚于城濮盟諸侯于  
踐土公背楚如會不及六月穆公卒子共公朔立晉文公



之季年衛成公不朝而使孔達侵鄭六年晉襄公伐衛衛人來告公曰更伐之我辭之衛使孔達伐晉七年公爲衛請成子晉執孔達以說魯臧文仲以陳衛之睦也求好於我十一年使季孫行父來聘十四年夏楚侵我克壺丘秋楚公子朱復伐我敗之獲其公子殺陳人懼及楚平十八年共公卒子靈公平國立共公之卒楚人不禮焉靈公受盟于晉自是晉楚爭陳兵交於國十三年周使單襄公聘于楚假道於我火朝覲矣道第不可行候不在疆司空不視塗澤不陂川不梁野有庾積場功未畢道無列樹墾田若執饌宰不致餼司里不授館國無寄寓縣無施舍民將築臺於夏氏及陳公與孔寧儀行父南冠以如夏氏留宿不見單子歸告王曰陳侯不有大咎國必亡靈公與孔寧儀行父通于夏姬衷其相服以戲于朝洧冶諫曰君臣宣淫民無效焉且聞不令君其納之公曰吾能改矣以告二子二子請殺之公弗禁遂殺洧冶夏姬者鄭穆公之女而哀大夫御叔之妻徵舒之母也十五年公與二子飲於夏氏公曰徵舒似女對曰亦似君徵舒病之公出自其廐射而殺之二子奔楚國人立世子午是爲成公元年正月公會楚子鄭伯于辰陵始服于楚十月楚子伐我謂陳人無動吾將有討於少西氏遂入陳殺夏徵舒因縣陳成公奔晉楚申叔時曰以義討徵舒而以貪縣陳其若諸侯何楚子感其言乃復封陳而納寧行父焉

史記靈公死太子午奔晉徵舒自立爲陳侯按春秋



靈公死明年楚子陳侯鄭伯盟于辰陵則太子未嘗奔  
晉也晉未嘗為君也蓋楚入陳然後陳侯出奔晉耳二

年宋人為晉伐我衛人來救二十七年晉悼公復伯楚公  
于士天為令尹侵欲於小國二十九年晉悼公會諸侯盟  
于雞澤公使袁僑如會及諸侯之大夫盟楚司馬何忌侵  
我三十年成公卒子哀公弱立楚人將伐我聞喪而止陳  
不聽命楚人使頓侵我我圍頓元年楚人討陳叛故殺壬  
夫而用公子貞晉范旬曰我喪陳矣楚人討貳而立子囊  
必改行而疾討陳陳近於楚民朝夕急能無往乎遂以諸  
侯成陳楚再來伐三年晉侯以諸侯來救公會之于鄆慶  
虎慶寅謂楚人曰吾使公子黃往而執之楚人從之二慶  
使告公曰楚人執公子黃矣君若不來羣臣不忍社稷宗

廟懼有二圖公懼逃歸遂及楚平十六年蔡公子愛將以蔡  
之晉蔡人殺一之慶虎慶寅畏公子黃之偏也訴諸  
楚曰與蔡司馬同謀楚人以為討黃奔楚呼於國曰慶氏  
求專陳國暴蔑其君而去其親五年不滅是無天也十九  
年公朝于楚黃愬二慶于楚楚人召之使慶樂往殺之慶  
氏以陳叛夏楚屈建從公圍陳陳人城板隊而殺人役人  
相命各殺其長遂殺慶虎慶寅楚人納黃二十年公會楚  
子蔡侯伐鄭當陳隧者并堙木刊鄭人怨焉二十一年夏鄭  
公子喜公孫僑伐我宵突陳城而入公扶太子偃師奔墓  
使司馬栢子賂以宗器公免擁社國人男女別而纍以待  
于朝鄭師還冬鄭公孫夏復伐我乃與鄭成二十二年晉



趙武楚屈建盟諸侯之大夫于宋於是晉楚之從始交相  
見哀公元妃鄭姬生悼太子偃師二妃生子留下妃生子  
勝二妃嬖留有寵屬諸司徒招與公子過公有廢疾三十  
五年招過殺太子偃師而立留公縊而卒于徵師赴于楚  
公子勝愬之于楚楚靈王執徵師殺之留奔鄭招歸罪於  
過而殺之九月楚公子棄疾奉偃師之子吳來伐遂滅陳  
放招于越殺孔奐哀公之嬖袁克殺馬毀王以葬楚子以  
穿封戌爲陳公晉平公問於史趙曰陳其遠亡乎對曰未  
也陳顓頊之後歲在鶉火是以卒滅陳將如之今在析木  
之津猶將復興且陳氏得政于齊而後陳卒亡臣聞盛德  
必百世祀虞之世數未也繼守將在齊其兆旣存矣明年

陳災鄭裨竈曰五年陳將復封封五十二年而遂亡子產

曰何故對曰陳水屬也火水妃而楚所相也今火出而火

陳逐楚而建陳也妃以五成故曰五年歲一立及鶉火而後

陳卒亡楚克有之天之道也故曰五十二年陳滅之五年楚

公子棄疾弑靈三代立欲和諸侯立悼太子偃師之子是

爲陳侯而歸之是爲惠公六年五月壬午宋衛陳奠災陳

鄭不救火許不弔災君子知其先亡史記惠公以陳滅之明年爲元年今以惠

公反國爲元年十一年夏齧帥師從楚人拒吳于雞父吳敗

我師獲夏齧二十四年惠公卒子懷公柳立元年吳入郢

使來召公公朝國人而問焉逢滑曰臣聞國之興也以

福其亡也以禍今吳未有福楚未有禍楚未可棄吳未可



從而晉盟主也以晉辭吳若何公曰國勝君亡非禍而何對曰國之有是多矣何必不復小國猶復況大國乎臣聞國之興也視民如傷是其福也其亡也以民爲土芥是其禍也楚雖無德亦不艾殺其民吳日敝於兵暴骨如莽而未見德焉天其或者正訓楚也禍之適吳其何日之有公從之四年吳復召公公恐如吳吳以前怒留之因卒於吳國人立公之子越是爲湣公八年吳王夫差克越伐我以修先君之怨十年孔子在陳十三年吳復伐我楚昭王來救師于城父卒于師乃及吳平十六年楚人伐我十七年楚復伐我吳季子來救二十二年楚伐吳公使公孫貞子如吳弔焉及良而卒尸入將命二十三年楚白公勝作亂不克而死我以其間侵楚二十四年楚公孫朝帥師來伐遂

### 滅陳

蘇子曰楚方北征諸夏而陳蔡許鄭適當其衝其爲國也難矣吳季子扎見鄭子產曰子爲國慎之以禮不然鄭國將敗子產以區區之鄭立於晉楚之間敬而不懼卒免大國之患非禮何以當之若陳蔡許顛沛隕越之不暇卒先鄭以滅善哉鄭渾罕之論之也曰姬在列者蔡及曹滕其先亡乎偪而無禮鄭先衛亡偪而無法作丘賦鑄刑書皆廢法以便事故曰法夫無禮則不能自立無以止大國之暴無法則不能字人氏將不懷大國不予不折必什民不予將以其力自斃此其所以爲亡之先後也



杞東樓公者夏禹之苗裔也周武王封之於杞以奉夏后  
氏之祀東樓公生西樓公西樓公生題公題公生謀娶公  
當周厲王時謀娶公生武公武公立四十七年卒子靖公立  
靖公二十三年卒子共公立共公八年卒子德公立世本作  
惠公德公生二子曰成公栢公德公十八年卒子成公立成公十  
八年卒弟栢公立德公生成公栢公此據世本春秋僖二  
十三年杞子卒左氏曰成公也史記無  
成公自栢公以上杞之朝會載於春秋而其君之卒葬不  
錄其世不可詳也當魯隱栢之世杞君稱侯莊僖之間杞  
君稱伯僖公末年杞君稱子文成以來乃復稱伯蓋近於  
東夷雜用夷禮用夏則進之用夷則退之魯僖公之十四  
年齊栢公帥師城緣陵遷杞以避淮夷之亂考其年疑成

公之世也自栢以來乃頗可考栢公六十二年朝于魯魯  
成公歸自晉言晉悼公之政栢公說驟朝于晉而請為晉自  
是諸侯之會盟未嘗不與栢公七十年卒子孝公句立孝  
公十七年卒子文公益姑立晉平公杞出也文公六年晉  
荀盈合諸侯之大夫以城杞諸侯皆不說鄭子太叔曰晉  
不卹周宗之闕而夏肄是屏其棄諸姬亦可知也晉司馬  
侯如魯治杞之侵地侯知諸侯之怨不盡歸也晉悼夫人  
愬之平公平公亦不之詰文公十四年卒弟平公郁釐立  
平公二年晉人復治杞田魯以成與之十八年卒子悼公  
成立悼公十二年會諸侯于召陵卒于會子隱公乞立七  
月隱公弟過弑隱公而自立是為僖公僖公十九年卒子



泮公維立泮公十六年公弟闕路弒泮公而自立是為哀  
公哀公十年卒泮公子款立是為出公出公十二年卒子簡  
命九官四岳皆當世有大功子孫不廢禹之後為夏於周  
為杞契為商於周為宋稷為周臯陶為英六益為秦四岳  
為齊許申羲和為楚六人皆有世家惟英六微弱無譜而  
垂夷夔龍其後不知所封如滕許邾莒薛唐隨之類其事  
班班見於春秋而世次不傳不可得而錄也

蘇子曰杞宋皆天子之事守也蓋禮樂車服在焉故孔子  
曰夏禮吾能言之杞不足徵也殷禮吾能言之宋不足徵  
也文獻不足故也宋雖不足徵然春秋之際晉楚大國有

所不知未嘗不問焉

晉悼公過宋觀桑林之舞楚靈王將  
會諸侯向戌欲公合諸侯之禮六

如杞遂至於夷無足言者昔孔子學官名於郊子之至微  
矣而其先王之遺文於諸侯為詳孔子之於夏禮蓋猶有  
考於杞歟而國無君子不能自列悲夫

陳杞世家第六



衛康叔世家第七

古史十四

康叔封者周武王之少弟也武王既克殷紂以殷餘民封紂子武庚祿父奉其先祀武庚未集恐其有異志乃以管叔蔡叔監殷以和其民武王崩成王少周公以冢宰當國管蔡疑之乃與武庚作亂周公以王命伐誅之以殷之故地封康叔為衛君居河淇之間分之以大路少帛緝蒺旃旌大呂彤民七族陶氏施氏繁氏錡氏樊氏饑氏終葵氏封畛土疆自武父之南及圃田之北竟取於有閭之士以共王職取於相土之東都以會王之東蒐聃季授土陶叔授民命以康誥酒誥梓材啓以商政疆以周索衛國既治復入周為司寇康叔卒子康伯卒立

左傳楚靈王所謂王孫牟也世本作髦



康伯卒子考伯立考伯卒子嗣伯立嗣伯卒子康伯立康

伯卒子靖伯立靖伯卒子貞伯立貞伯卒子頃侯立史記頃侯

厚賂周夷王夷王命衛為侯今按書成王之世康叔稱衛侯又曰孟侯蓋以侯為方伯故其子孫六世稱伯猶詩以

召公為召伯而非伯爵也至頃侯蓋不復為方伯故但以爵稱非以賂故得侯也頃侯十二年卒

子釐侯立釐侯十三年周厲王奔彘二十八年周宣王立四

十二年釐侯卒世子共伯餘蚤死立其弟和是為武公史記和

寵於釐侯釐侯多予之賂和以賂士襲攻共伯於墓上共伯入釐侯美自殺衛人因葬之釐侯旁案毛詩柏舟之句

曰衛世子共伯蚤死其妻守義父母欲奪而嫁之誓而不許初無篡奪之文且武公賢者衛人謂之睿聖武公奪適

之故事未可遽以誣之故疑而不錄也武公脩康叔之政百姓和集四十二年大

戎殺周幽王武公將兵佐周平戎甚有功為平王三公年

九十有五猶箴儆於國曰自卿以下至于師長士苟在朝

者無謂我老耄而舍我必恪恭於朝以交戒我在輿有旅

賁之規位宁有官師之典倚几有誦訓之諫居處有褻御

之箴臨事有警史之導宴居有師工之誦史不失書矇不

失誦於是作抑戒追刺厲王以自儆五十五年卒衛人謂

之睿聖武公子莊公揚立莊公娶于齊曰莊姜賢而無子

衛人為之賦碩人又娶于陳曰厲嬀生孝伯早死其娣戴

嬀生宁莊姜以為己子公子州吁嬀人之子也有寵而好

兵公弗禁莊姜惡之石碏諫曰將立州吁乃定之矣若猶

未也階之為旤夫寵而不驕驕而能降降而不憾憾而能

眡者鮮矣弗聽其子厚與州吁游禁之不可二十二年莊

公卒子桓公定立石碏請老十三年鄭太叔段作亂不克



美子滑來奔爲之伐鄭取廩延久鄭人伐我十六年二月  
弔吁弒桓公而自立將脩先君之怨於鄭而求寵於諸侯  
以和其民是時宋公子馮奔鄭鄭人將納之乃使公孫文  
仲與陳蔡伐鄭民苦於用兵作擊鼓之詩州吁使石厚聞  
其父碯求所以自安碯曰朝陳使求覲於王可也厚從州  
吁如陳碯使告陳曰衛國褊小老夫耄矣無能爲也此二  
人者實弒寡君敢即圖之陳人執之而請涖於衛衛人皆  
殺之召公子晉于邢而立之是爲宣公宣公烝於夷姜生  
急子屬諸右公子洩爲之娶於齊而美公娶之生壽及朔  
屬壽於左公子職夷姜縊宣姜與朔構急子公使諸齊使  
盜待諸莘將殺之壽子告之使行不可曰棄父之命惡用  
子矣有無父之國則可也及行壽飲之酒載其旌以先盜  
殺之急子至曰乃我也此何罪又殺之二子死朔爲世子十  
九年宣公卒子惠公朔立惠公四年左右公子怨惠公逐之  
立黔牟惠公奔齊黔牟立八年齊宋陳蔡來納惠公明年  
春王人子突來救不勝諸侯惠公復入放黔牟于周放甯  
跪于秦殺左右公子惠公初立至是十三年矣二十五年  
王子頹來奔師及燕師伐周立子頹三十一年惠公卒子  
懿公赤立三年齊桓公以王命討立子頹師及齊師戰敗賂  
之乃還九年狄伐我懿公好鶴鶴有乘軒者將戰國人受  
甲者皆曰使鶴鶴實有祿位子焉能戰公使右祁子審莊  
子守渠孔御戎子伯爲右黃夷前驅孔嬰齊殿及狄人戰



敗于滎澤公不去其旗是以甚敗石祁子甯莊子夜與國人出狄入衛又敗我河上惠公之少也公子頑烝于宣姜生齊子戴公文公宋栢夫人許穆夫人文公爲衛之多惠也先適齊及敗宋栢公逆其遺民宵涉河男女七百三十人益之以共滕之民爲五千人立戴公申以廬于曹齊栢公使公子無虧以兵成之遺之祭服乘馬牛羊雞犬戴公未逾年卒立其弟文公燬初惠公以讒殺二兄國人不附及狄之禍國人思復立急壽之後而急壽皆無子黔牟及頑皆急壽之弟也故立其子二年齊栢公帥諸侯城楚邱自曹遷焉文公大布之衣大帛之冠務材訓農通商惠工敬教勸學授方任能元年革車三十乘季年乃三百乘十

三年秋侵我十六年晉公子重耳過我公不爲禮十七年齊栢公卒十八年邢人狄人侵我爲菟圃公以國讓父兄子弟及朝衆曰苟能治之燬請從焉衆不可而後師于訾婁狄師還十九年衛大旱卜有事於山川不吉甯莊子曰音周饑克虜而年豐今邢方無道諸侯無伯天其或者使衛討邢乎遂伐邢師興而雨二十年齊狄盟于邢爲邢謀我二十一年秋侵我二十五年正月伐邢使禮至兄弟亡入邢事其大夫國子衛師至國子巡城禮至掖以赴外殺之遂滅邢五月文公卒子成公鄭立二年正月晉文公將侵曹假道于我弗許遂伐我取五鹿公欲與楚國人不欲出公以說晉公出居襄牛晉人分我田以畀宋人四月晉文公敗



楚師于城濮公懼奔楚遂適陳使元咺奉叔武以受盟或  
訐元咺曰立叔武矣其子角從公公殺之咺不廢命奉叔  
武以入守六月晉人歸公甯武子與國人盟以安衆公不  
信叔武先期而入公子歆大華仲前驅叔武將沐聞君至  
喜提髮走出前驅射而殺之公知其無罪也枕之股而哭之  
命殺歆大元咺奔晉冬會于溫公與元咺訟不勝晉人執公  
歸于京師而歸元咺于衛咺立公子瑕五年晉人使醫衍  
酖公不死魯爲我請晉人歸公公殺元咺及報而後入六  
年狄圍我遷于帝立以避之七年侵狄及狄盟晉文公之季年  
公不朝九年晉襄公伐我公與陳共公謀使孔達伐晉十  
年陳爲我未成于晉執孔達以說十二年晉人歸孔達公  
如晉拜十六年晉人歸我臣戚之田三十五年成公卒子穆  
公遯立三年孔達及晉原穀宋華椒曹人同盟于清丘曰  
恤病討貳陳貳於楚宋以盟故伐陳孔達救之曰先君有  
約言焉若大國討我則死之四年晉人來討五年殺孔達  
以說十一年四月孫良夫帥師及齊戰敗于新築乞師于晉  
六月及晉魯敗齊侯于鞏得其侵地八月穆公卒子定公  
臧立五年孫林父出奔晉十二年春公如晉晉侯將見孫  
林父公不許公歸晉侯使卻犇見之公欲辭定姜曰不許  
必亡雖惡之不猶愈於亡乎公見而復之秋公有疾使孔  
成子甯惠子立敬姒之子衎爲太子十月定公卒子獻公衎  
立不哀定姜旣哭而息不內酌飲嘆曰是夫也將不唯衛國



之敗其必始於未亡人烏乎天禍衛國也夫吾不獲鱗也  
使主社稷大夫聞之皆懼元年楚侵我二年公爲晉伐鄭  
自是與楚鄭爲怨十八年四月公戒孫林父甯殖食日旰  
不召而射鴻於囿二子從公不釋皮冠而與之言二子怒  
孫子如戚孫蒯入使公飲之酒使工歌巧言之卒章蒯懼以  
告林父林父曰君忌我矣不先必及公知之使子矯子伯  
子友與林父盟林父皆殺之己未公如鄆使子行于林父  
林父又殺之公出奔齊國人立公孫剽孫林父甯殖相之以  
聽命於諸侯是爲殤公公弟子展子鮮從公齊人以邾寓公  
魯人使厚成叔弔于衛歸告臧紇曰衛君其必歸乎有太  
叔儀以守有母弟鱣以出或撫其內或營其外能無歸乎  
魯人又使臧紇唁公公與之言虐退而告其人曰衛侯不得  
入矣其言糞土也亡而不變何以復國子展子鮮聞之見臧  
紇與之言道臧孫說曰衛君必入二子者或輓之或推之欲  
無入得乎晉侯問衛故於中行偃對曰衛有君矣不如因  
而定之推亡固存不亦可乎冬諸侯會于戚以定衛殤公  
六年甯殖病將死告其子喜使納獻公喜許諾十一年秋  
晉侯使魏舒宛沒逆獻公於齊使衛與之夷儀獻公自夷  
儀使與甯喜言甯喜許之大叔儀聞之曰君子之行思其  
終也思其復也故曰慎始而敬終終以不困今甯子視君不  
如奕棋奕者舉棋不定不勝其偶而況置君而弗定乎必  
不免矣甯喜亦畏公之不信也使告曰必子鮮在公以命鱣



鮒辭敬妣強之公使謂甯喜苟反政由甯氏祭則寡人甯  
喜告遠伯玉伯玉曰瑗不得聞君之出敢聞其入遂行從近  
關出告右宰穀穀曰不可獲罪於兩君喜以父命告穀曰  
我請使焉而觀之反曰君淹恤在外十二年矣而無憂色亦  
無寬言猶夫人也不已必死喜曰子鮮在穀曰子鮮在何  
益多而能亡喜曰雖然弗可以已孫林父在戚二月庚寅  
甯喜右宰穀攻孫氏殺孫襄辛卯弑殤公及太子角孫林  
父以戚奔晉甲午獻公入大夫逆於竟者執其手而與之  
言道逆者自車揖之逆於門者領之而巳公怨太叔儀使  
讓之儀欲亡公止之使殖綽攻戚殺晉戊三百人林父詐之  
晉夏晉趙武合諸侯之大夫于戚以討衛疆戚田公往會

之晉人執公及甯喜秋齊侯鄭伯為公故如晉晉人許之

冬納女于晉乃釋公

史記言獻公入與殤公十二年孫穉單政公

使甯子攻孫氏孫林父奔晉請納獻公齊景公聞之與獻  
公如晉求入晉人誘殤公及甯子而執之其說不根今以

左氏為正 獻公後元年公患甯喜之專也使公孫免餘攻而殺

之及右宰穀公弟鮒曰逐我者出納我者死君失其信而

國無刑不亦難乎遂出奔晉公止之不可託於木門不嚮

衛國而坐終身不仕公使免餘為卿辭曰太叔儀不貳能

贊大事君其命之乃以儀為卿二年討甯氏之黨石惡奔

晉三年獻公卒子襄公惡立吳季札過衛說遠瑗史狗史

鮒公子荆公叔發公子朝曰衛多君子未有患也九年八

月襄公卒襄公夫人姜氏無子嬖人媯始生子孟縶有廢疾孔



成子夢康叔謂已立元余使羈之孫圉與史狗相之史朝  
夢與成子協旣而媾始生子名之曰元乃立之是爲靈公  
公孟縶狎齊豹奪之司寇與鄆有役則反之無則取之又惡  
北宮喜褚師圃欲去之公子朝通於襄夫人宣姜懼而欲  
爲亂十三年秋豹喜圃朝作亂公孟有事于蓋獲之門外  
齊人伏甲殺之公聞亂如死烏齊氏之宰渠子召北宮喜  
北宮氏之宰不與謀殺渠子而伐齊氏滅之公與北宮喜  
盟而入公子朝褚師圃奔晉殺宣姜二十九年公會諸侯于  
召陵諸侯將長蔡於衛公使祝鮀私於周萇弘曰康叔以  
賢用於周爲司寇而蔡叔以罪廢其子胡帥德改行僅乃  
得封先王尚德而已非尚年也奈何違之萇弘說告劉子

與范獻子謀之卒長衛君二十二年魯人伐鄭過我假道  
及還陽虎使季孟自南門入出自東門舍於豚澤公使弼  
子瑕追之公叔儀老矣輦而如公曰昭公之難君將以文之  
舒鼎成之昭兆定之輦鑑苟可以納之擇用一焉公子與二  
三臣之子諸侯苟憂之將以爲之質此羣臣之所聞也今將  
以小忿蒙舊德無乃不可乎太妣之子惟周公康叔相爲  
睦也而效小人以棄之不亦誣乎天將多陽虎之罪以斃  
之君姑待之若何乃止是時晉失諸侯齊鄭叛之三十二  
年齊侯鄭伯盟于鹹公欲叛晉諸大夫不可北宮結如齊  
而私於齊侯曰執結以侵我乃盟于瑣三十三年晉師救  
魯還過我將盟公子鄭澤趙鞅曰誰敢盟衛君者涉佗成



何曰我能盟之衛人請執牛耳成何曰衛吾溫原也焉得  
視諸侯將軟涉佗按公手及挽公怒王孫賈趨進曰盟以  
信禮也有如衛君其敢不惟禮是事而受此盟也公欲叛  
晉而患諸大夫王孫賈使次于郊大夫問故公語之詬且  
曰寡人辱社稷其改卜嗣寡人從焉大夫曰是衛之禍豈  
君之過也公曰又有患焉謂寡人必以而子與大夫之子為  
質曰苟有益也公子則往羣臣之子敢不皆負羈縶以從  
將行王孫賈曰衛國有難工商未嘗不為患使皆行而後  
可大夫又將行之行有日公朝國人使賈問焉曰若我叛  
晉晉五代我病何如矣皆曰五代我猶可以戰賈曰然則  
叛之病而後質何遲之有遂叛晉晉人請改盟弗許秋晉

士鞅侵我魯人侵我三十四年齊侯伐晉次于五氏晉車千乘  
在中牟公將會齊卜過之龜焦公曰可也衛車當其半寡人  
當其半敵矣乃過中牟中牟人欲伐之衛褚師圃亡在中牟  
曰衛雖小其君在焉未可勝也齊師克城而驕其帥又賤遇之  
必敗乃伐齊師敗之齊侯致禱嬖杏於衛三十八年孔子自  
魯來祿之如魯大夫南子有寵於公公叔戌欲去其黨夫  
人愬之曰戌將為亂三十九年公叔戌北宮結出奔魯趙陽  
出奔宋南子宋女也故與宋朝通公為之召朝太子蒯聵  
如齊過宋野野人歌之曰既定爾婁豬盍歸吾艾豎太子  
差之謂其臣戲陽速曰從我而朝少君我顧則殺之太子  
見夫人三顧速不進夫人覺之啼而走曰蒯聵將殺余公



執其手以登臺太子奔宋已而之晉趙氏太子蒯聵之出也公謂子郚余無子將立女對曰郚不足以辱社稷君其改圖四十二年四月靈公卒夫人命立子郚曰君命也郚曰亡人之子輒在乃立輒是為出公六月晉趙鞅納蒯聵于戚出公元年石曼姑及齊國夏帥師圍戚八年孔子自陳來九年孔子歸魯十年公會魯侯吳子于郟我嘗殺吳行人且姚及會吳人藩公之舍魯人使子貢見大宰嚭而辭焉嚭說乃舍公公歸而効夷言公孫弥牟曰君必不免其死于夷乎執之而又說其言從之固矣孔圉之妻太子蒯聵之姊也生悝而圍卒其豎渾良夫通焉孔姬使見太子于戚太子與之言曰苟使我入獲國服冕乘軒三死無與

使請於伯姬伯姬許之十三年良夫與太子入迫孔悝而強

盟之召獲駕乘車奉出公奔魯季路死之孔悝立蒯聵是

為莊公左傳衛出公元年在魯哀公三年其出在魯哀公十五年凡十三年而史記出公自立至出止十二年

年左傳莊公元年在魯哀十六年死在十七年凡二年而史記莊公元年在魯哀十五年至死凡三年皆失之也

莊公居外父怨諸大夫莫逆欲盡去之元年子還成孔悝

奔宋公以占夢嬖人卜人求酒於大叔遺弗得告公而逐

之大叔遺奔晉公謂渾良夫曰吾繼先君而不得其器若

之何良夫曰疾與亡君皆君之子也召之而擇材焉若不

才器可得也豎告太子疾疾使五人輿豶從已劫公而強盟

之且請殺良夫公曰其盟免三死曰請三之後有罪殺之

公曰諾哉二年公成虎幄於藉圃求令名者而與之始食



焉太子請使良夫良夫乘衷甸兩牡紫衣狐裘至袒裘不  
釋劔而食太子使牽以退數三罪而殺之晉趙鞅使來告  
曰君在晉也志父為主請君若太子來以免志父公辭以  
難太子又使椽之夏趙鞅圍衛齊人來救趙鞅還冬趙鞅復  
伐我入郭國人出公而與晉平晉人立襄公之孫般師而還  
十月公自鄆入般師出初公登城見戎州曰我姬姓也何戎之  
有翦之公使匠父又欲逐石圃故圃因匠氏攻公公踰城  
而隊折股戎州人攻之太子疾公子青踰從公戎州人殺  
之公入于已氏已氏之妻髮美公嘗髡之以爲呂姜髮故  
已氏殺公國人復般師而立之十二月齊人伐我執般師  
立公子起而還君起元年夏石圃逐起出公自齊歸逐石

圃而復石圃與大邾遺出公初十三年而亡亡三年復入  
出公入而奪南氏邑奪司寇亥政又使侍人納公文要之  
車于池公之夫人夏戊之女也其弟期爲司徒夫人寵衰  
期得罪褚師比有足疾韞而登席公怒欲斷其足公使  
三匠父公使優狡盟拳弥而甚近信弥復入之七年褚師  
比公孫弥牟公文要司寇亥司徒期因三匠與拳弥以攻  
公公適城鉏使如越請師八年魯叔孫舒送樂莜越臯如  
后庸來納公公孫弥牟將納之公文要曰君愎而虐少待  
之必毒於民乃睦於子矣師侵外州大獲出禦之大敗搃  
褚師定子之墓而焚之公孫弥牟致衆而問焉曰君以蠻  
夷伐國國幾亡請納之衆曰勿納曰弥牟亡而有益請自



北門出衆曰勿出重賂越人申開守陴而納公公不敢入  
師還國人立靈公之子黜是爲悼公以城鉏與越公日期  
爲此令苟有怨於夫人者報之期聘於越公攻而奪之幣  
期告於越而以衆取之公怒殺期甥之爲太子者遂死於  
越悼公之世晉知伯將伐我獻野馬四白璧一羣臣皆賀  
公孫弥牟有憂色公曰何故對曰野馬四白璧一此小國  
之禮也而大國致之君其圖之公以其言告邊境知伯果  
起兵襲我至境而反曰衛有賢者知吾謀矣已而又欲來  
襲我使其太子亡奔衛弥牟又曰太子顏知伯之愛子也  
非有大罪而亡必有故也使人逆之於境曰車過五乘慎  
勿納也知伯乃止悼公十八年卒

左傳出公復入之八年  
悼公立其事甚詳而史

記出公復入二十一年卒黜攻出公子而自立悼公五年  
卒事既失實不可復信今但取其年以定悼公之年而已

子敬公弗立敬公十九年卒子昭公糾立是時三晉強衛如  
小侯事之昭公六年公子亶弒公代立是爲懷公懷公十  
一年公子頽弒公代立是爲愼公愼公父公子適適父  
敬公也愼公四十二年卒子聲公訓立聲公十年卒子成侯  
速立世本速作逝是時公孫鞅入秦十六年衛更貶號爲侯二  
十九年成侯卒子平侯立八年平侯卒子嗣君立五年更  
貶號曰君獨有濮陽嗣君雖益削小然好術而修政衛人  
稱之衛有賢者胥靡逃之魏贖之百金魏不與乃請以左  
氏羣臣諫曰以百金之地贖一胥靡無乃不可乎君曰治  
無小亂無大教化喻於民三百之城足爲治民無廉耻雖



十左氏何以用之嗣君立凡四十二年卒子懷君立三十一年朝魏魏囚殺懷君更立嗣君弟是爲元君元君魏壻也故魏人立之元君十四年秦拔魏東地置東郡徙衛野王以濮陽益東郡二十五年元君卒子君角立九年秦并天下二十二年二世廢君角爲庶人衛絕祀

蘇子曰衛之大亂者再皆起於父子夫婦之際宣公靈公專欲以興禍固無足言者急子壽子爭相爲死而莊公出公父子相攻出入二十餘年不以爲耻賢愚之不同至此哉然急壽勇於義惜其不爲吳太伯而蹈申生之禍以重父之過可以爲廉矣未得爲仁也昔者孔子之門人季路高柴皆事出公孔子自陳反於衛子路問曰衛君待子而爲政

子將奚先孔子曰必也正名乎名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足故君子名之必可言也言之必可行也君子於其言無所苟而已矣嗚呼衛之名於是可謂不正矣靈公黜其子而子其孫出公不父其父而祔其祖人道絕矣孔子於是焉而欲正之何爲而可靈公之死也衛人立公子郢郢不可則衛人立輒使輒而知禮必辭辭而不獲必逃輒逃而郢立則名正矣雖以拒蒯聩可也雖然孔子爲政豈將廢輒而立郢邪其亦將教輒避位而納蒯聩耳蒯聩得罪於父生不養死不喪然於其入也春秋書曰晉趙鞅帥師納衛世子蒯聩于戚非世子而以世子



名之以其子得立於衛成其爲世子也若輒避位而納其父是世子爲君也而名有不正乎名正而衛定矣

衛康叔世家第七



